



Terenga 2: Hōtaka 33 – kīanga wā

Tēnā koutou e aro nui mai nei ki te puipuiaki a kui mā, a koro mā i waiho mai ai ki te ao tūroa. Nā Tā Hēmi Hēnare te kōrero “Ko te reo te mauri o te mana Māori”. Mā tātou e whakatinana aua kupu kia mauriora ai te reo i tōna anō whenua.

Hei Mahi Whakarongo

I tēnei hōtaka ka rongu tātou i ngā whakamārama a te Rau o Huna, a Wharehuia Milroy, ki tētehi whakataukī nō whakapata. He matapihi te momo tautōhito i a Wharehuia ki ngā māramatanga nō tuawhakarere. Anei ngā pātai hei whakamaunga atu mō ō koutou taringa.

1. He aha te tikanga o te whakataukī i kōrerohia nei e Wharehuia?
2. He aha ngā kīanga a Wharehuia e pā ana ki te wā, ki te taka rānei o te wā?
3. He aha te pānga o te whakataukī nei ki te ao hou?

He Whakamārama

He nui ngā kīanga mō te taka o te wā. Ko te tīwhiri nui e mōhio ai koe mehemea ko te wā kua hipa kei te kōrerohia, ko te wā rānei kei te heke, kei te āhua o te tīmatanga o te kīanga.

- | | |
|--------|--|
| ā | wā heke (ākuanei, ā kō ake nei, āpōpō, ākuni) |
| i / nō | wā hipa (ina tata nei, inanahi, i nāia tonu nei, nō nanahi) |

Hei Manatu

Anei te kaupapa hei manatu mā tātou i te rangi nei:

taihoa / tatari

He rerekē te whakamahinga o ēnei kupu Māori e rua mō te kupu ‘wait’ ki te reo Pākehā.

Taihoa! He kupu tēnei hei whakatūpatou i te tangata, hei whakahau rānei i te tangata kia manawanui

Tatari He kupu mahi tēnei. Kia tū ai ia hei tohutohu, me whai mai i te kupu ‘Me’, me whakahāngū rānei.

1. Me tatari tāua ki konei.
2. Tāria te wā kia kite anō tāua i a tāua.

Kia maumahara ake, kei whai i te whakatakotoranga o te reo Pākehā e whakamahi ana i te kupu ‘mō’ i muri i te tatari. He pai ake mehemea ka whakamahia te ‘ki’, te ‘i’ rānei pēnei:

3. E tatari ana au **ki** taku hoa.

Hei Mahi

Whakapākehātia ēnei kīanga wā:

1. Kāore e roa ka tae atu au.
2. Kāore i roa ka tae atu mātou.
3. Ā kō tonu ake nei tīmata ai te kiriata.
4. Nō nā tata nei rātou i tae mai ai.
5. Hei ātahirā tātou tūtaki anō ai.

Whakautu:

1. Won't be long and we'll be there.
2. It wasn't long before we arrived.
3. The movie's about to start.
4. They just got here.
5. We'll meet again the day after tomorrow.